

VENDIM
Nr. 722, datë 13.12.2023

PËR DISA TË DREJTA TË PUNONJËSVE TË AGJENCISË SË MBIKËQYRJES
POLICORE

Në mbështetje të nenit 100 të Kushtetutës, të neneve 62, pika 4, 66, pika 6, dhe 70, pikat 1, shkronjat “b”, “c” dhe “d”, dhe 3, të ligjit nr. 128/2021, “Për Agjencinë e Mbikëqyrjes Policore”, me propozimin e ministrit të Brendshëm, Këshilli i Ministrave

VENDOSI:

1. Punonjësi i Agjencisë së Mbikëqyrjes Policore (në vijim “punonjësi i Agjencisë”), i emëruar në detyrë, i cili me urdhër të drejtorit të përgjithshëm të Agjencisë transferohet ose emërohet, në përputhje me funksionin që mban, brenda strukturave qendrore dhe vendore të Agjencisë, përfiton pagesë për kompensimin e shpenzimeve të udhëtimit, si më poshtë vijon:

- a) nga 36 km deri 60 km, në masën 10 000 (dhjetë mijë) lekë/muaj;
- b) nga 61 km deri 100 km, në masën 15 000 (pesëmbëdhjetë mijë) lekë/muaj;
- c) nga 101 km deri 150 km, në masën 20 000 (njëzet mijë) lekë/muaj;
- ç) nga 151 km deri 200 km, në masën 25 000 (njëzet e pesë mijë) lekë/muaj;
- d) mbi 200 km, në masën 30 000 (tridhjetë mijë) lekë/muaj.

Përfitimi i kësaj pagese vazhdon deri në ndryshimin e vendbanimit të punonjësit të Agjencisë, që nënkupton sistemin me banesë në territorin që përkon me juridiksionin e njësisë strukturore të Agjencisë së Mbikëqyrjes Policore, ku punonjësi është caktuar.

2. Për përfitimin e pagesës, sipas pikës 1 të këtij vendimi, punonjësi i Agjencisë së Mbikëqyrjes Policore paraqet në strukturën përgjegjëse të burimeve njerëzore dokumentacionin e poshtëshënuar:

- a) kërkesë me shkrim, ku është i punësuar si punonjës i Agjencisë;
- b) fotokopje të kartës së identitetit, certifikatën e gjendjes familjare;
- c) vërtetim nga organi i qeverisjes vendore, ku të vërtetohet vendbanimi i familjes dhe i vetë punonjësit të Agjencisë, pavarësisht nga gjendja civile;
- ç) vërtetim pranë drejtorive vendore të Agjencisë Shtetërore të Kadastrës, nëse punonjësi i agjencisë ka banesë në juridiksionin ku është transferuar;
- d) vërtetim pranë drejtorive vendore të Agjencisë Shtetërore të Kadastrës, nëse punonjësi i Agjencisë ka aplikuar për legalizim banese në juridiksionin ku është transferuar.

3. Kur punonjësi i Agjencisë transferohet ose emërohet në detyrë në punë jashtë vendbanimit të tij, dhe për këtë shkak, bashkëshorti ndërpret marrëdhëniet e punës, bashkëshorti ka të drejtë të përfitojë një pagë mujore, në rast se nuk mund të punësohet në vendin e transferimit ose të emërimit në punonjësit të Agjencisë. Paga mujore përfitohet deri në datën e punësimit të bashkëshortit, por jo më shumë se 15 (pesëmbëdhjetë) vjet. Paga mujore është në masën 100 (njëqind) % të pagës mesatare mujore të vitit të fundit të punës, por, në çdo rast, jo më shumë se 150 (njëqind e pesëdhjetë) % të pagës minimale në shkallë vendi, të miratuar me vendim të Këshillit të Ministrave.

4. Paga mujore, sipas pikës 3 të këtij vendimi, rritet me të njëjtën masë, si dhe masa e indeksimit të pagave të të punësuarve në institucionet e administratës publike, sipas vendimit përkatës të Këshillit të Ministrave.

5. Për përfitimin e pagesës, sipas pikës 3 të këtij vendimi, punonjësi paraqet në Agjencinë e Mbikëqyrjes Policore dokumentacionin e poshtëshënuar:

- a) Kërkesë me shkrim, me gjenealogjet e plota, drejtuar strukturës përgjegjëse të burimeve njerëzore, në të cilën përcaktohen:

- i. urdhri i transferimit;
 - ii. data e transferimit;
 - iii. arsyeja e transferimit;
 - iv. adresa ku ka banuar deri në momentin e transferimit;
 - v. adresa aktuale ku banon pas transferimit;
 - vi. qendra e punës ku ka punuar bashkëshortja/i, data dhe shkaku i largimit nga puna.
- b) Për hartimin dhe miratimin e procedurës, njësia përgjegjëse e burimeve njerëzore kërkon nga punonjësi dokumentacionin, si më poshtë vijon:
- i. vërtetim të pagës mesatare mujore të vitit të fundit kalendarik të punës për pagesën e marrë nga bashkëshortja/bashkëshorti;
 - ii. vërtetim nga sigurimet shoqërore për kontributet e derdhura nga bashkëshorti/bashkëshortja për periudhën e punësimit;
 - iii. librezën e punës së bashkëshortes/it, ku të jetë cilësuar largimi nga puna për arsye të transferimit të bashkëshortes/it;
 - iv. vërtetim nga zyra përkatëse e punësimit, ku të vërtetohet se bashkëshortja/i është regjistruar si punëkërkues i papunë dhe nuk i është ofruar punë në profesionin e saj/tij. Këtë vërtetim punonjësi e paraqet çdo 3 (tre) muaj në njësinë përgjegjëse të burimeve njerëzore;
 - v. kontratën e qirasë së banesës ku punonjësi është i transferuar;
 - vi. fotokopje të kartës së identitetit, certifikatën e gjendjes civile familjare;
 - vii. vërtetim nga njësia administrative/bashkiake/bashkia, ku të vërtetohet vendbanimi i familjes dhe i vetë punonjësit të Agjencisë, pavarësisht nga gjendja civile.
6. Vjetërsia në punë e bashkëshortes/it konsiderohet vjetërsia e përgjithshme në punë, për të cilën janë paguar kontributet e sigurimeve shoqërore, e pasqyruar në dokumentacion sipas procedurave për regjistrimin dhe evidentimin e kontributeve, me përjashtim të viteve të sigurimit vullnetar, vetëpunësimit, shërbimit ushtarak për meshkujt, viteve të shkollimit në institucionet e arsimit të lartë dhe periudhave të trajtimit me pagesë papunësie.
7. Koha e qëndrimit pa punë e bashkëshortes/it të punonjësit të Agjencisë llogaritet në vjetërsinë e përgjithshme të punës, për efekt përfitimi pensioni pleqërie, invaliditeti e familjar, sipas ligjit nr. 7703, datë 11.5.1993, "Për sigurimet shoqërore në Republikën e Shqipërisë", të ndryshuar. Kontributi në degën e sigurimeve të pensioneve derdhet nga institucioni, sipas legjislacionit në fuqi për sigurimet shoqërore mbi bazën e pagesës së përcaktuar në pikën 3, të këtij vendimi.
8. Punonjësi i Agjencisë për rezultate të larta në punë, gjatë kryerjes së detyrave e shërbimeve të veçanta në realizimin e veprimtarive të Agjencisë, si dhe në luftën kundër korrupsionit dhe shkeljeve të tjera të ligjit, përfiton shpërblim deri në 6 (gjashtë) paga mujore në vit. Ky shpërblim përballohet nga fondi i pagave të Agjencisë së Mbikëqyrjes Policore dhe mund të jepet përgjatë të gjithë vitit kalendarik.
9. Për përfitimin e pagesës, sipas pikës 7 të këtij vendimi, drejtori i drejtorisë qendrore apo rajonale në Agjenci paraqet në strukturën përgjegjëse të burimeve njerëzore, në Agjencinë e Mbikëqyrjes Policore, propozimin për shpërblim për punonjësin, duke e shoqëruar me relacionin për rezultatet konkrete të arritura. Pas shqyrtimit të propozimit dhe të verifikimeve, drejtori i Përgjithshëm i Agjencisë së Mbikëqyrjes Policore, nëpërmjet një vendimi të arsyetuar, miraton ose jo përfitimin e këtij shpërblimi.
10. Në rast sëmundjeje të rëndë apo fatkeqësie familjare, punonjësi i Agjencisë së Mbikëqyrjes Policore përfiton ndihmë financiare në masën e 1 (një) page mujore (pagën më të lartë mujore të nivelit të ulët drejtues).
11. Për përfitimin e ndihmës financiare, sipas pikës 9 të këtij vendimi, punonjësi i Agjencisë paraqet në strukturën përgjegjëse të burimeve njerëzore, në Agjencinë e Mbikëqyrjes Policore, dokumentacionin, si më poshtë vijon:
- a) Për sëmundje të rëndë:

- i. raport mjekoligjor nga spitali ku është shtruar;
 - ii. kopje të kartelës ekzaminuese të shtrimit në spital.
- b) Në rast të vdekjes së një anëtarit të familjes së tij (bashkëshorti/ja, prindërit apo fëmijët):
- i. certifikatë familjare;
 - ii. certifikatë vdekjeje të familjarit.
12. Punonjësi i Agjencisë gëzon të drejtën e pushimit vjetor të pagueshëm, si më poshtë vijon:
- a) 45 (dyzet e pesë) ditë kalendarike për punonjësit e nivelit të lartë drejtues;
 - b) 40 (dyzet) ditë kalendarike për punonjësit e nivelit të mesëm drejtues;
 - c) 35 (tridhjetë e pesë) ditë kalendarike për punonjësit e nivelit të ulët drejtues;
 - ç) 30 (tridhjetë) ditë kalendarike për punonjësit e nivelit ekzekutiv.
13. Efektet financiare, që rrjedhin nga zbatimi i këtij vendimi, përballohen nga buxheti vjetor i miratuar për Agjencinë e Mbikëqyrjes Policore.
14. Vendimi nr. 776, datë 19.11.2014, i Këshillit të Ministrave, “Për disa të drejta të punonjësve të Shërbimit për Çështjet e Brendshme dhe Ankesat, në Ministrinë e Punëve të Brendshme”, shfuqizohet.
15. Ngarkohen Ministria e Brendshme dhe Agjencia e Mbikëqyrjes Policore për zbatimin e këtij vendimi.
- Ky vendim hyn në fuqi pas botimit në Fletoren Zyrtare.

ZËVENDËSKRYEMINISTËR
Belinda Balluku